

Date – 02/04/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Larsap Gen (retd) Vijay Kumar Singh an vawiin khan lehlangin Lawngtlai a tlawh.
2. Operation Brahma hnuiah India chuan Lengpui Airport kaltlangin Myanmar-ah lirnghing tuarte tanpuina thahnem tak a thawn mek.
3. Waqf (Amendment) Bill 2025 chu vawiin khan Lok Sabha-ah sawiho tan a ni.
4. Sawrkar laipui chuan tribal zirlaite tan Eklavya Model Residential School 728 a din belh dawn.

<><><>

GOVERNOR

Larsap Gen (retd) Vijay Kumar Singh an vawiin khan lehlangin Lawngtlai a tlawh a. Larsap hian Lawngtlai District chhunga MLA, Autonomous District Council hotute, Sawrkar hnathawk, VC leh NGO hruguitute meeting a neihpui bakah school 14 te hman tur smart board a hlan a, Diltlang South khuua kangmei tuarte hnenah tanpuina a hlan bawk.

Larsap chuan Lawngtlai District chhunga khaw 13, power supply pek la ni lote'n an neih thuai theih nana hmalak a tul a ti a, sawrkar department, VC leh NGO te chu khawtlanga dawmkan ngaite ngaihvena puih tum turin a chah a. Ramri bulhnaia awmte zalen taka inkalpawhna Free Movement Regime (FMR) chu tunhma atanga lo neih tawh a nih thu sawiin, tunhnaiah thenawm ram buai avangin khua leh tuite him zawk nan leh dan lova ramri kana thil tih a awm loh nan inkaihruaina thar siam a ni a, hei hian harsatna siam a tum lova, khua leh tuite tana tha tura ruahman zawk a ni, a ti.

Larsap chuan ramri kaltlanga ruihhlo tawlhruk a hluar chu veiawm a tih thu sawiin, Mizoram chu ram ralmuang leh nuam a nih zel theih nana tanrual a tul a ni, a ti a. Sawrkar laipui scheme pawimawh hrang hrangte tarlangin, mipuite'n an chhawr tangkai theih nana tanlak a tul thu a sawi bawk.

DC Conference Hall-a Sawrkar Department hotute, VC, NGO, zirtirtute leh zirlaite nena an inkawmnaah District Bawrhsap Pu Cheemala Siva Gopal Reddy chuan Lawngtlai District administration, venhimna dinhmun, project tlangpui, mamawh leh theihna neihte a sawifiah a ni.

VC - Langa Lawngtlai tlawha lo zin Larsap Gen (retd) Vijay Kumar Singh-a hian Diltlang South khuua kangmei tuarte DC office Chamber-ah kawmin

PMAY hamthatna hmanga in an din leh ngei theih nana hma la turin District Bawrhsap a chah nghal a. Governor's Discretionary Grant kaltlangin kangmeiin a tih chhiat in neitu chhungkaw 9 te hnenah tanpuina sumfai Rs 1,00,000/- leh inluahu chhungkaw 8 te hnenah Rs 5,000/- theuh a hlan a. Hemi hnu hian Larsap chuan Chawnhu-a DC Bungalow-ah Lawngtla District chhunga MLA leh Autonomous District Council pahnih, Lai Autonomous District Council (LADC) leh Chakma Autonomous District Council (CADC) a CEM leh EM te a kawm a ni.

<><><>

OPERATION BRAHMA

Operation Brahma hnuiah India chuan Myanmar-ah lirnghing tuarte tanpuina thahnem tak a thawn mek a, Indian Air Force sipai thlawhna C-17 Globemaster chu nimin khan lirnghing tuarte mamawh tur tam tham tak phurin Lengpui Airport ah alo tum a ni.

United States siam sipai thlawhna Indian Air Force ta hian metric tonne 65 zeta rit mipui mamawh hrang hrang a phur a, heng a phurh te hi tui intur, buhfai, damdawi, mut bu te leh in enkawlna atana mamawh hrang hrang te an ni.

Lengpui Airport thuneitute sawi danin heng bungraw hrang hrang lirnghing tuarte tanpuina tur hi Assam Rifles ten Zokhawthar ah Truck hmangin an chhek chho dawn a, heta tang hian Myanmar ram chhunga Chin state paltlangin lirnghing tuarte tanpuina an pe dawn a, India sawrkar leh Myanmar sipai sawrkar pawh hemi chungchangah hian an inbe tawh nia thudawn a ni.

External Affairs Minister Dr. S. Jaishankar chuan Operation Brahma hnuiah India chuan Myanmar-ah tanpuina thahnem tak a thawn thu a sawi a. Nimin khan Indian Air Force C-130J thlawhna hmangin buhfai leh ei tur bakah tanpuina bungrua tonne 16-a rit chu Delhi atangin Mandalay ah thawn a ni a, Indian Navy lawng lian, INS Ghariyal pawh Vishakhapatnam atangin ei leh in tur metric tonne 442 phurin a chhuak a. External Affairs Minister sawi danin Mandalay-ah Indian Army field hospital unit din a ni tawh bawk.

Operation Brahma tia vuah Lirnghing avanga chhiatna hrang hrang thleng leh inchhanchhuahna hna thawhna tura India sipaite hmalakna hi thla liamta March ni 29 khan tan a ni a, he hmalakna ah hian India mithiam hrang hrang damdawi lam leh lirnghing sawhkhawk tuar te sawngbawl tura mithiam bik te chuan Myanmar rama lirnghing tuar te an enkawl dawn a, heng bakah hian India sawrkar chuan Myanmar ah hian tanpuina thahnem tak thlawhna leh lawng hmangin a thawn lut bawk a ni.

<><><>

DRUGS SEIZED

Nizan khan Lawngtla District-a Bualpui (NG) ramchhung Serzawl kawngah Assam Rifles, Mizoram Police leh YLA tangkawp chuan ruihhlo thahnem tak an man.

Nizana beihpui thlakah ah hian Myanmar lam mi hnen atangin Methamphetamine Mum 42000, Kg 4 leh gram 600 a rit an man a, hei hi tualchhung hralthnaa chhutin cheng nuai 59 leh sing 8 man hu niin Myanmar aṭanga Mizoram a pêk tur ni ngei tura rin a ni.

Tunhnai khan Lawngtlai District, Bualpui (Ng) a Raltnan awm mek te hi Mizoram Police, Assam Rifle, VC leh Young Lai Association ten ko khawmin raltnan awmdan tur hrang hrang hrilhhriat an ni a, ram leh khawtlang a him zawk theih nan leh mipui leh Raltnan ten thawhhona tha an neih theih nan a tangkai chi hrang hrangte sawilan a ni a, Tun hnai khan Bualpui (Ng) ah ruihhlo man a tam avangin Raltnanten an zawmtur hrang hrang duan a ni a, Khawchhung a, Raltnan Kenbo Bike leh lirthei dang kawlte chu khawchhungah chauh hman phal sak niin an zin dawn in Joint VC Secretary hnenah in report a lehkha lak zel tur a ni dawn a. An haw hunah lehkha kengin Joint VC Secretary hnenah in report leh tura tih an ni bawk.

<><><>

QUARRY ASSN PRESS CONFERENCE

Mizoram Quarry Association chuan Quarry ah permit nei lova lung la leh her tam tak an awm tih sawiin heng mite hian sawrkarah chhiah an chhung lo an ti.

He thu hi vawiina Aizawl Press Club-a chanchinbu mite an kawmnaah sawiin Mizoram Quarry Association President Pu C.Ladinfela chuan sawrkar in mining check gate a siamah Danin a phut anga permit neilo te chuan Form O pek tur an nei lo a ti a, Mizoramah Company hrang hrang Mizoram pawn atanga lo lutin Mizoram chhungah ram hmasawnna turin heng company te hian an hnathawhna atan chauh lung lak phalna an ni a, an hnaa an hman tur bak pawn lamah hrall chhuah phalna an nei lo a ti a, Company pawn lama hrall thin an awm chu an duhloh thu sawiin Mizoram sawrkarah chhiah an pek loh avangin mipuiten dawr tawhloh turin an duh tih an sawi bawk.

Pu C Laldinfela chuan Mizoram sorkarin tun hnaiah lung halna thahnem tak an man thu leh an man thenkhatte chu Quarry nei si lung la lo mahse permit nei tho atangin a nih thu a sawi a. Quarry neituten hian lung halna permit an neih chu thla khata sawrkarin lei zat tur a bituk an tla lo zawk thin tih sawiin dan ang thlapa kalpui chhunzawm zel an duh tih a sawi bawk.

<><><>

ASF

Animal Husbandry & Veterinary Department Joint Director Dr Lalrotluanga Sailo chuan ASF chu vawk natna inkaichhawn awlsam leh hlauhawm tak a ni a, a enkawlna a awmloh avangin AH&Vety Dept chuan kum 2025 chhunga he hri hi a len lohnau theihtawp a chhuah a ni, a ti.

He thu hi vawiina Akashvani Corr Lalengmawii'n a kawmnaah sawiin Dr Lalrotluanga Sailo chuan ASF in Mizoram a chenchilh tlat tawh avangin tunhnaihah Zawlnuam leh Lawngtlai lamah a hri a rawn leng leh a, hmun danga a kai darh zel loh nan Dept pawhin hma a la nasa a. Inter District Movement of Pigs kalpui turin thupek siamin mipuite pawh zirtir a ni, a ti a. ASF lenna hmunah khuahkhirh anih theihna atan ASF vanga vawk thi in te damdawi hmanga tih thianghlim tir niin disinfectant te pawh department in a sem thin a ni, a ti.

ASF hri chu a darh zel lohnau mipuite pawhin thu zawm a, vawk damlo leh vawk thi sa zawrh leh la sawn lo tura an ngen thu a sawi a. ASF chu a darh lohna atan vawk inah pawn lam mi luh tir lo a, vawk in a luh leh chhuah dawn apianga thawmhaw thianghlim ha a vawk in leh a vel damdawi leh sahbawn hmanga tihfai chu a pawimawh thu a sawi a ni.

Vawiin khan ASF vanga vawk thi zat hi 67 niin vawk 7 suat a ni a. Kumin chhunga vawk thi zat chu vawk. 614 niin vawk 114 suat a ni tawh a. Vawk suat avanga zangnadawmna hi kum 2021 kha vawk neitute hnenah an pawisa dawn tur zat zaa 25 pek an ni a, kum 2022 khan za a 25 tjo prk leh niin kum 2023 khan an pawisa dawn tur zat za a 25 pek an ni tawh bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

WAQF

Waqf (Amendment) Bill 2025 chu vawiin khan Lok Sabha-ah sawiho tan a ni. Joint Parliamentary Committee in Waqf (Amendment) Bill 2025 hi a ennawn hnuah vawiin khan house ah pharh a ni a. Bill puluttu Union Minority Affairs Minister Kiren Rijiju chuan Muslim sakhaw kalphung tihdanglam tumna anih loh thu sawiin Qaqf Boards ten ram leh ro an neih ngaihtuahna tur chauh anih thu a sawi a. Minister chuan hmanlai thil tuaithar tumna lam anih loh thu sawiin tunlai thlirna mila hmalakna niin tu ram mah chhuhsak an tum lo a ti a.

Hetihlai hian Congress hruaitu gaurav Gogoi chuan sawrkar chu he bill chungchangah mipuite rilru hruai kawi ah a puh a. He bill hi ram danpui Constitution kalh anih thu sawiin he bill hmang hian danpui tihdanglam an tum niin sawrkar a puh a. India mipuite thendarh tumna anih thu a sawi bawk a ni.

He bill hi chanchinthar buatsaih lai tleng hian sawiho ala ni.

Vawiin vek khan Rajya Sabha chuan rampawn atanga lo pem lutte leh ramdangmite tana Visa leh thildang awlsam zawka pekna tur dan Immigration and Foreigners Bill,2025 chu a pass a. He bill hi ahmain Lok Sabha-ah pass alo ni tawh bawk a ni.

<><><>

EMRS

Sawrkar laipui chuan tribal zirlaite tan Eklavya Model Residential School 728 a din belh dawn. EMRS din belh turah hian tribal zirlai nuai 3 leh sing 5 chuang an lut thei dawn a. Vawiin thlengin school 721 din tura tih niin heng zingah school 477 te chu a taka kalpui mek a ni. Union Minister of State for Tribal Affairs Durgadas Uikey chuan Rajya Sabha-ah ziaka zawnha chhangin rampumah Central Scheme hnuiah hian EMRS hi kum 2018-2019 atang khan din tan anih thu a sawi a. He scheme hnuiah hian block tinah tribal zaa 50 aia tam awmna hmunah chuan EMRS hi din tum anih a sawi bawk a ni.

<><><>